

# तीमुथियुस क पहिली पत्र

1 पौलुस कईती स जउन हमार उद्धारकर्ता परमेस्सर अउर हमार आसा मसीह ईसू क हुकुम स मसीह ईसू क प्रेरित बना बा, 2तीमुथियुस क जउन बिसवासे में मोर सच्चा बेटवा बा, परमपिता परमेस्सर अउर हमरे पभू ईसू मसीह कईती स अनुग्रह, दया अउर सान्ति मिलइ।

## झूठा उपदेसन क विरोध में चेतावनी

3मैसिडोनिया जात समइ मई तोह सबन स जउन इफिसुस में ठरहा रहइ क कहे रहेउँ, मई अबहुँ उही आग्रह- क दोहरावत रहेउँ। ताकि तू उहाँ कछू लोगन क झूठा उपदेस देत रहइ, 4कल्पना स भरी कहानी अउर अनन्त वंसावलियन पर जउन लड़ाई-झगड़ा क बढ़ावा देत हीं, अउर परमेस्सर क ओह प्रयोजन क सिद्ध नाही होइ देत हीं; जउन बिसवासे पर टिका बा, धियान देइ स रोक सकई 5एह आग्रह क प्रयोजन बा उ पिरेम जउन पवित्तर हिरदय, उत्तम चेतना अउर छल रहित बिसवास स पैदा होत ह। 6कछू जने तउ इन बातन स छिटक क भटक गवा अहई अउर बेकार क वाद विवादन में जाईके फँसा बाटेन। 7उ पचे व्यवस्था क उपदेसक तउ बनई चाहत हीं, मुला जउन कछू उ कहत रहेन य जेन्हन बातन पइ वो बहुत बल देत हयेन, ओन्हन तक क ओ सबइ नाही समझतेन।

8हम अब इ जानित ह कि अगर केउ व्यवस्था क ठीक ठीक तरह स प्रयोग करइ, त व्यवस्था उत्तम बाटइ।

9मतलब इ जानइ क बा कि व्यवस्था धर्मियन क बरे नाही बल्कि अबिसवासी, पापी, अउर अपवित्तर अधर्मियन, महतारी, बाप क मारी डावइवालन, हतियारन, 10व्यभिचारिन समलिंग कामुकन, सोसण कर्ता लोगन, झूठ क बोलवइयन, कसम तोड़इवालन या अइसेन हीं अन्य कामन क बरे बा, जउन सिच्छा क विरोध में बा। 11उ सिच्छा परमेस्सर क महिमामय सुसमाचार क अनुसार बा। उ सुधन्य परमेस्सर स मिलत ह। अउर उ सुसमाचार का मोहका सँउपा गवा बा।

## परमेस्सर क अनुग्रह क धन्यवाद

12मई, हमार पभू ईसू मसीह क धन्यवाद करत हउँ। मोका उहइ सकती दिहेस ह। उ मोका बिसवासी समझिके अपने सेवा में तैनात किहे बाटइ। 13जद्यपि पहिले मई ओकर अपमान करइवाला, सतावइवाला अउर एक बिनयरहित मनई रहेउँ। मुला मोहे पइ दया कीन्ह गइ काहेकि एक अबिसवासी क रूपे में इ नाही जानत भए कि मई का कछू करत हउँ मई सब कछू किहेउँ। 14अउर पभू इ अनुग्रह मोका बहुतायत स मिला ह अउर साथे ही उ बिसवास अउर पिरेम उ जउन मसीह ईसू में बा। 15इ कथन

सही बा अउर सब केउ क स्वीकार करइ जोग्ग बा कि मसीह ईसू एह संसारे में पापियन क उद्धार करइ बरे आई-बाटइ। सच मई तउ सबसे बड़ा पापी हउँ। 16अउर इही बरे तउ मोहे पइ दया कीन्ह गइ। कि मसीह ईसू एक बड़इका पापी क रूपे में मोर उपयोग करत आगे चलिके जउन लोग ओहमाँ बिसवास ग्रहण करिहीं, ओनके बरे अनन्त जीवन मिलइ बरे एक उदाहरण क रूप में मोका स्थापित कइके आपन असीम सहनशीलता देखॉइ सकइ। 17अब उ अनन्त सम्राट अविनासी, अदृश्य एक मात्र परमेस्सर क युग युगान्तर तक सम्मान अउर महिमा होत रहइ। आमीन।

18मोर बच्चा तीमुथियुस! नबियन क बचनन क अनुसार बहुत पहिले स ही तोहरे सम्बन्धे में जउन भविस्सबाणियन कइ दीन्ह गइ रहिन, मई तोहका इ हुकुम देत अही जम कइ ताकि तू ओनके अनुसार 19बिसवास अउर उत्तम चेतना स सहित होइके नेकी क लड़ाई जम कइ लइ सका। कछू अइसेन हयेन जेनकर उत्तम चेतना अउर बिसवास रूपी जहाज बूड़ गवा बा। 20हुमिनयुस अउर सिकन्दर अइसेन ही हयेन। हम ओनका सइतान क सँउप दिहे हई ताकि ओनका परमेस्सर क विरोध में परमेस्सर क निन्दा करइ स रोकई क पाठ पढ़ावा जाइ सकइ।

## स्त्री-परुसन बरे कछू नेम

2 सबसे पहिले मोर बिसेस रूपे स इ निवेदन बा कि सबके बरे आवेदन, पराथना, अनुरोध अउर सब मनइयन कईती स धन्यवाद दिहा जाइ। 2सासकन अउर सभन अधिकरियन क धन्यवाद दिहा जाइ। ताकि हम चैन क साथे सांतिपूर्वक पूरे स्रद्धा अउर परमेस्सर बरे सम्मान स भरा जीवन जी सकी। 3हमार उद्धारकर्ता परमेस्सर क खुसी करईवाल अहइ। उ उत्तम अहइ। 4उ सभन मनइयन क उद्धार चाहत ह अउर सत्य का गियान चाहत ह। 5काहेकि परमेस्सर एक्कई बा। अउर मानुस अउर परमेस्सर क बीच में मध्यस्थता एक्कई बा। उ खुदइ एक मानुस अहइ ईसू मसीह। 6उ सबन क बरे खुद क फिरौती क रूप में दइ डाए अहइ। अउर परमेस्सर क सब लोगन क बचावै क उदेस को व्यक्त किहे अहइ। 7अउर इ साच्छी क प्रचार करइ बरे मोका एक प्रचारक अउर प्रेरित रखा गवा (इ मई सचइ कहत हउँ, झूठ नाही) मोका गैर यहूदियन क बरे बिसवास अउर सत्य क उपदेसक क रूपे में ठहरावा गवा।

8इन्ही बरे मोर इच्छा बा कि हर कहुँ सब मनइयन पवित्तर हाथन क उप्पर उठाइके परमेस्सर क बरे समर्पित होइ बिना कीहीउँ गुस्सा या मन-मोटाऊ पराथना करई।

9इही तरह स्त्रियन स भी मई इ चाहित हउँ कि उ पचे सीधी-सादी वेस-भूसा में सालीनता अउर आतिम संयम क साथे रहई। अपने आपे क सजावइ सँवारइ क बरे उ बारे क बेणियन न सजावई अउर सोना, मोतियन अउर बहुमूल्य वस्त्रन स सुंगार न करई। 10बल्कि अइसेन स्त्रियन क जउन अपने आप क परमेस्सर क उपासिका मानत हीं, ओनके बरे उचित इ बा कि वो खुदइ क उत्तिम कामे स सजावई।

11एक स्त्री क चाही कि उ सांत भाव स सारे समर्पन क साथे सिच्छा ग्रहण करइ। 12मई इ नाही चाहित कि कउनउ स्त्री कउनउ मनई क सिखावइ पढ़ावइ अउर ओह पर सासन करइ। मुला ओका तउ चुपचाप ही रहइ चाही। 13काहेकि आदम क पहिले बनावा गवा बा अउर तब पाछे हव्वा क। 14आदम क बहकावा नाही जाइ सका मुला स्त्री क बहकाइ लिहा गवा अउर उ पापे में पतित होइ गइ। 15मुला अगर उ में जइसन क करतब क निभावत भाए बिसवास, पिरेम, पवित्तर अउर परमेस्सर क बरे समर्पण में बनी रहइ तउ स्त्रियन क उद्धार तउ जरूर मिल जाई।

### कलीसिया क निरीच्छक

3 इ एक बिसवास करइ जोग्ग कथन बा कि अगर केउ निरीच्छक बनइ चाहत ह तउ उ एक अच्छे कामे क इच्छा रखत ह। 2अब देखा ओका एक अइसी जिन्नगी जिअइ चाही जेकर लोग निआव स भरी आलोचना न कइ पावई। ओकर एकई पत्नी होइ चाही, ओका आत्मसंयमी, सुसील अउर अतिथि सत्कार करइवाला अउर सिच्छा देइ में निपुण होइ चाही। ओका पइसा क पिरेमी न होइ चाही। 3ओका पियकइ न होइ चाही, न तउ ओका झगडालू होइ चाही। ओका तउ सज्जन अउर सात्ति प्रेमी होइ चाही। ओका पैसे का पिरेमी न होइ चाही। 4अपने परिवारे क उ अच्छा प्रबन्धक होइ अउर ओनकर बच्चन ओरके कब्जे में रहत रहई। ओकर पूरा सम्मान करत होई। 5(अगर केउ अपने परिवारे क प्रबन्ध करइ नाही जानत तउ उ परमेस्सर क कलीसिया क प्रबन्ध कइसे कइ पाई?) 6उ एक नवा बिसवासी न होइ चाही ताकि उ अहंकार स फूलि न जाइ। अउर ओका सइतान क जइसा दण्ड पावइ पड़इ। 7एकरे अलावा बाहेर क लोगन में भी ओकर अच्छी इज्जत होइ चाही ताकि उ कउनउ आलोचना में फँसिके सइतान क फंद में न पड़ि जाइ।

### कलीसिया क सेवक

8इही तरह कलीसिया क सेवकन केउ आदरणीय होइ चाही अउ ओका अउर दु मुँहा न होइ चाही। ओकर मदिरापान में रुचि न होई चाही। बुरे रस्तन स ओनका धन कमाइ क इच्छुक न होइ चाही। 9ओनका तउ पवित्तर मने स हमरे अभिव्यक्त सत्यन क थामे रखइ चाहे। 10एन्हेऊ क पहिले निरीच्छकन क समान परखा जाइ चाही फिन अगर ओनके विरोध में कछू आपत्ति न होइ तबहिं एनका कलीसिया क सेवकन क न रूप में सेवा काम करइ देइ चाही।

11इही तरह स्त्रियन क भी सम्मान क जोग्ग होइ चाही। ओनका निंदक न होइ चाही। बल्कि सालीन अउर सब तरह स भरोसा करइवाली होइ चाही। 12कलीसिया क सेवक क केवल एकई पत्नी होइ चाही अउर ओका आपन बाल बच्चन अउर अपने घरानन क अच्छा प्रबन्धक होइ चाही। 13काहेकि अगर क कलीसिया क अइसेन सेवक क रूप में होईहीं जउन अच्छा सेवा प्रदान करत हीं, तउ उ पचे अपने बरे सम्मान स भरा स्थान अर्जित करिहीं। मसीह ईसू क बरे बिसवासे में जरूरइ ओनकइ आस्था होई।

### हमार जीवन क रहस्य

14मई इ आसा क साथे तोहे इ बातन क लिखत हउँ कि जल्दी ही तोहरे लगे आउबइ। 15अगर मोका आवइ में समइ लग जाइ तउ तोहे सबन क पता रहइ कि परमेस्सर क परिवारे में, जउन सजीव परमेस्सर क कलीसिया बा, कउनो क आपन व्यवहार कइसे रखइ चाही। कलीसिया तउ सब क जइ अउर आधार स्तम्भ अहइ।

16बिना संदेह क हमरे भक्ति का रहस्य महान बाटइ:

उ नर-देह धरे परगट भवा आतिमा द्वारा धर्मी प्रमाणित भवा देखेन ओका सरगदूतन हुआ प्रचारित उ राष्ट्रन में, जग तउ ओहपइ बिसवास किहेस, अउर उठावा गवा ओका महिमा में उप्पर।

### झूठन उपदेसकन स सचेत रहा

4 पवित्तर आतिमा तउ स्पस्ट रूपे स कहत बाटइ कि आगे चलिके कछू लोग सच्चे बिसवास (उपदेस) पइ बिसवास न करिहीं अउर भटकावइवालन झूठन नबियन अउर दुस्ट आतिमन की सिच्छा पर धियान देइ लगिहीं जउन झूठ बोलिहीं अउर धोखा देत रहई। 2ओन झूठन पाखण्डी लोगन क कारण अइसे मनइयन होईहीं जे सच अउर झूठ क विवेक न कइ सकिहीं अउर इ जेनकइ मन माना तपत लोहे स दाग दीन्ह गवा होइ। 3उ पचे बियाह क निसेध करिहीं। कछू चीज खाई क मना करिहीं जेका परमेस्सर क बिसवासियन अउर जउन सच क पहिचानत हीं, ओनके बरे धन्यवाद दइके ग्रहण कइ लेइके बनावा गवा बा। 4काहेकि परमेस्सर क रची सब चीज अच्छी बा अउर कउनउ चीज तियागइ जोग्ग नाही बा बसर्त ओका धन्यवाद क साथे ग्रहण कीन्ह जाइ। 5काहेकि उ परमेस्सर क बचन अउर पराथना स पवित्तर होइ जात ह।

### मसीह ईसू क अच्छा सेवक बनअ

6अगर तू भाइयन क इन बातन धियान दियावत रहब्या तउ मसीह ईसू क अइसेन अच्छा सेवक ठहरब्या जेकर पालन-पोसण, बिसवासे क द्वारा अउर ओन्हीं सिच्छा क द्वारा होत ह जेका तू ग्रहण किहे अहा। 7मनइयन क स्रब्दा विहीन कल्पित सबइ कथा स दूर रहा अउर परमेस्सर क सेवा क बरे अपने क साधना में लगाए रखा। 8काहेकि सारीरिक साधना स तउ केवल तनिक ही लाभ होत ह जबकि परमेस्सर क सेवा सब कइँती स मूल्यवान बा काहेकि एहमाँ आज क समइ अउर आवइवाला जीवन क

बरे दीन्ह गवा आसीर्वाद समावा बाटइ। 9एइ कहावत पूर रूप स सच अहइ। अउर इ पूरी तरह ग्रहण करइ जोगग अहइ। 10अउर हम सबहिं इही बरे कठिन मेहनत करत जुझत रहित ह। हम आपन आसा सबके विसेस कर बिसवासियन क, उद्धारकर्ता सजीव परमेस्सर पइ टिकाइ दीन्ह ह।

11एनही बातन क हुकुम अउर उपदेस द्या। 12तू अबहिं जवान अहा। इही स कउनउ तोहे निम्न न समझइ। बल्कि तू आपन बातचीत, चाल चलन, परिम-प्रकास, अपने बिसवास अउर पवित्तर जीवन स बिसवासियन क बरे एक उदाहरण बनि जा। 13जब तक मई आई तू पवित्तर सास्तरन क सार्वजनिक पाठ करा, उपदेस अउर सिच्छा देई में अपने आप क लगाए रखा। 14तोहका जउन बरदान मिला बा, तू ओकर उपयोग कइके इ तोहे नबियन क भविस्सबाणी क परिणाम सरूप बुजुगन क द्वारा तोहपइ हाथ रखि दीन्ह गवा बा। 15इन बातन क कारण पइ पूरा धियान लगाए रखा। एन्ही में स्थित रहा ताकि तोहार प्रगति सब लोगन क सामने परगट होइ।

16अपने जीवन अउर उपदेस क विसेस धियान रखा। ओनही पर टिका रहा काहेकि ओन पइ चलइ अउर सही रूप स पालन करइ में विसेस बल दा। अइसेन आचरण करत रहे स तू खुद अपने आपइ क अउर अपने सुनइवालन क उद्धार करव्या।

### व्यवहारे क कछू नेम

5 कउनउ बड़ी आयु क मनई क साथे कठोरता स न बोला, बल्कि ओनहे बापे क रूप में देखत ओनके बरे विनम्र रहा। सलाह देत समइ अपने स छोटन क साथे भाइयन जइसा बर्ताव करा। 2बड़ी स्त्रियन क महतारी समझा अउर जवान स्त्रियन क आपन बहिन समझिके सब पवित्रतन क साथे बर्ताव करा।

3ओन्हन विधवन क विसेस धियान रखा जउन वास्तव में अकेले अहईं। 4मुला अगर कउनउ विधवा क बेटवा-बिटिया अउर नाती पोता अहईं तउ ओन्हे सबसे पहिले अपने धरम पर चलत चलत अपने परिवार क देखभाल करइ सीखइ चाही। ओनका चाही कि ओ पचे अपने महतारी-बापे क पालन पोसन क बदला चुकावई काहेकि एहसे परमेस्सर खुस होत ह। 5उ विधवा जउन सही में विधवा बाटइ अउर जेकर धियान रखइवाला केउ नाहीं बाटइ, अउर परमेस्सर तउ जेकर सबइ आसा क सहारा बा उ दिन रात बिनती अउर पराथना में लगी रहत हीं। 6मुला उ विधवा जे बिसय भोग क दास होइ गइ अहईं जीते जी मरे भएन क समान बाटिन। 7इही बरे बिसवासी लोगन क इन बातन क (ओनके सहायता क) आदेस द्या ताकि कउनउ भी ओनकर आलोचना न कइ पावइ। 8मुला अगर केउ आपन रिस्तेदारन, विसेसकर आपन पिरवार क सदस्यन क सहायता नाहीं करत, तउ उ बिसवास स फिन गवा बा अउर कउनो अबिसवासी से भी जियादा खराब बा।

9ओन्हन विधवन क विसेस सूची में जउन आर्थिक सहायता लेत बाटिन ओनही विधवा क नाउँ लिखा जाइ

जउन कम स कम साठ साल क होइ चुकी बाटिन अउर जउन पतिब्रता रही हईं। 10अउर जउन बाल बचन क पालत करत, अतिथि सत्कार करत भए, परमेस्सर क लोगन क पाउँ धोवत भए दुखियन क सहायता करत-करत, अच्छा कामन क बरे समर्पित होइके सब तरह क अच्छा कामन क बरे जाना-मानी जात रहिन।

11मुला सयानी-विधवन क एह सूची में सामिल न करा काहेकि मसीह क बरे ओनकर समर्पण पइ जब ओनकर बिसय वासना भरी इच्छा हावी होत ह तउ उ फिन बियाह करइ चाहत ह। 12उ सबइ अपराधिन हइन काहेकि ओन्हन आपन मूलभूत प्रतिज्ञा क तोड़े हइन। 13एकरे अलावा ओनका आलस क आदत पड़ि जात ह। उ सबइ एक घरे स दुसरे घरे घूमत फिरत हीं अउर उ सबइ न केवल आलसी होइ जात हीं, बल्कि उ बातूनी बचिके लोगन क कामन में टोंग अड़ावइ लागत हीं अउर अइसेन बात बोलइ लागत हीं जइसे ओंहे न बोलइ चाही। 14इही बरे मई चाहत हईं कि जवान-विधवन बियाह कइ लेईं अउर औलाद क पइदा करत भए अपने घर बारे क देखभाल करईं ताकि हमरे दुम्नन क हम पर कटाच्छ करइ क कउनउ अवसर न मिलि पावइ। 15मई इ बरे बतावत हईं कि कछू जवान विधवन क सइतान द्वारा पहिलेन स ही बहकाई गइ रहिन। 16अगर कउनो बिसवासी स्त्री क घरे में विधवा हइन तउ ओन्हे ओकर सहायता खुद करइ चाही। अउर कलीसिया प कउनउ भार न डावइ चाही ताकि कलीसिया सच्ची विधवन क सहायता कइ सकइ।

17जउन निरीच्छक कलीसिया क अच्छी अगुआइ करत हीं ओनका दुगना सम्मान क पात्र होइ चाही। विसेस कर उ पचे जेनकर काम उपदेस देब अउर पढ़ाउब बा। 18काहेकि पवित्तर सास्तर में कहा गवा बा, “बरधा जब खरिहाने में होइ तउ ओकर मुँह न बाँधा।”\* अउर “मजदूर क आपन मजदूरी पावइ क अधिकार बा।”\*

19कउनो निरीच्छन पइ लगावा गवा कउनउ लांछन क तब तक स्वीकार न करा जब तलक दुई य तीन साच्छी न होईं। 20जउन हमेसा पापे में लगा रहत हीं ओनका सबके सामने डाटा-फटकारा ताकि बाकी लोग डेराईं।

21परमेस्सर, ईसू मसीह अउर चुना भवा सरगदूतन क सामने हम सचाई क साथे आदेस देत हईं कि तू बिना कउनो पूर्वाग्रह क इन बातन क पालन करा। पच्छपात क साथे कउनउ काम न करा।

22बिना विचारे केउ क कलीसिया क मुखिया बनवइ क बरे ओह प जल्दी में हाथ न रखा। केउ क पापन में भागीदारी न बना। अपने क हमेसा पवित्तर रखा। 23तीमुथियुस, केवल पानी ही न पिअत रहअ। बल्कि अपने हाजमा अउर बार बार बीमार पड़इ स बचइ क बरे तनिक दाखरास भी लइ लिहा करा।

24कछू लोगन क पापन सही रूप स परगट होइ जात हीं अउर निआव क बरे पेस-कई दीन्ह जात ह मुला दुसरे

\*“बरधा ... बाँधा” लूका 10:7

\*“मजदूर ... बा” व्यवस्था: 25:4

लोगन क पापन बाद में परगट होत हौं। 25इही तरह अच्छा काम भी सही रूप स परगट होइ जात ह मुला जउन परगट नाहीं होतेन तउ उ पचे भी छुपा नाहीं रह सकतेन।

6 जउन लोग अंधबिसवासी क जुए क नीचे क दास बना अहई, ओन्हे अपने स्वामियन क सम्मान क जोगग समझइ चाही ताकि परमेस्सर क नाउँ अउर हमरे उपदेसन क निन्दा न होइ। 2अउर अइसेन दासन के भी जेनकर स्वामी बिसवासी हयेन, बस इही बरे कि उ पचे ओनकर धरमभाई अहई, ओनके बरे कम सम्मान न देखौवइ चाही, बल्कि ओनका तउ अपने स्वामियन क अउर अधिक सेवा करइ चाही काहेकि जेनका एकर लाभ मिलत बा, उ पचे बिसवासी अहई, जेनसे उ पचे पिरेम करत हौं। इन बातन क सिखावत रहा अउर एनकर प्रचार करत रहा।

### झूठइ उपदेस अउर सच्चइ धन

3अगर केउ एनमौं स अलग बात सिखावत ह अउर हमार पभू ईसू मसीह क ओन्हन सदबचनन क नाहीं मानत ह अउर परमेस्सर क सही तरीके स सेवा करे की सिच्छा स सहमत नाहीं होत ह 4तउ उ अहंकार में फूला बा अउर कछू भी नाहीं जानत ह। उ तउ कुतर्क करइ अउर सब्दन क लेइके झगड़इ क रोग स घिरा बाटइ। इन बातन स त ईसा, बैर, निन्दा-भाव अउर गाली-गालौज 5अउर ओन लोगन क बीच जेकर बुद्धि बिगड़ गइ बा, कबहुँ न खत्म होइवाला मतभेद पैदा होत ह अउर भ्रष्ट दिमाग क अहइ, जउन सत्य क खोइ चुका अहइ। अइसेन लोगन क बिचार बा कि परमेस्सर क सेवा धन कमाइ क ही एक साधन अहइ।

6निश्चय ही परमेस्सर क सेवा-भक्ति स ही आदमी बहुत सम्पन्न बनत ह। पर ई ओन्हीं क बरे सत्य बा जउन ओसे संतुस्ट होइ जात ह, जउन ओका मिलत ह। 7काहेकि हम संसारे में न तउ कछू लइके आइ रहे अउर न ही इहाँ स कछू लइके जाइ पाउब। 8तउन अगर हमरे लगे रोटी अउर कपड़ा बा त हम उही में सन्तुस्ट हई। 9मुला जउन धनवान बनइ चाहत हौं, जे प्रलोभन में पड़िके जाल में फँसि जात हौं ओनका अइसेन ढेर मूर्खपना अउर बिनास करइवाली इच्छन घेरि लेत हौं जउन ओनकर पतन अउर बिनास होय जात ह। 10काहेकि धन क पिरेम सब तरह क बुराइ क जनम देत ह। कछू लोग आपन इच्छन क कारण ही

बिसवास स भटकि गवा हयेन अउर अपने क पीड़ित कइके कस्टमय समस्याआ का झेलत बाटेन।

### याद रखइ जोगग बातन

11मुला हे परमेस्सर क लोग, तू इन बातन स दूर रहा अउर नेकी, परमेस्सर क सेवा, बिसवास, पिरेम धीरझ, अउर सज्जनता में लगा रहा। 12हमार बिसवास जउन उत्तम स्पर्धा क अपेच्छा करत ह, तू उही क बरे संघर्ष करत रहा अउर अपने बरे अनन्त जीवन क अर्जित कइ ल्या। तोहका उही क बरे बोलावा गवा अहा। तू बहुत स लोगन क सामने उस परम सत्य का (ईसू मसीह का) बहुत अच्छे तरह स अंगीकार किहे अहा। 13परमेस्सर क सामने, जउन सब क जीवन देत ह अउर ईसू मसीह क सामने जे पुन्तियुस पिलातुस क सामने बहुत अच्छी साच्छी दिहे रहा, मई तोहका इ हुकुम देत हई कि 14जब तलक हमार पभू ईसू मसीह परगट होत ह, जब तलक तोहे जउन हुकुम दीन्ह गवा बा, तू उही पर बिना कउनउ कबहुँ छोड़े निर्देस भाव स चलत रहा। 15उ ओह पइ धन्य, एक छत्र, राजा लोगन क राजा अउर सम्राटन क पभू क उचित समइ आए पइ घटित करी। 16उ अगम प्रकास क निवासी अहइ। ओका न केउ देखे बा, न केउ देखि सकत ह। ओकर सम्मान अउर ओकर अनन्त सक्ति क बिस्तार होत रहइ। आमीन। 17वर्तमान युग क चीजन क कारण जउन लोग अमीर बने भए अहई, ओन्हे आज्ञा द्या कि उ पचे अभिमान न करई। अउर ओह धने स जउन जल्दी चला आई कउनउ आसा न रखई। परमेस्सर पर ही आपन आसा टिकावई जउन हमका हमार आनन्द क बरे सब कछू भरपूर देत ह। 18ओनका आज्ञा देई कि उ पचे अच्छा अच्छा काम करई। अच्छा कामन स ही धनी बनई। उदार रहई अउर दूसरन क साथे आपन चीजे बाँटई। 19अइसेन करई स ही उ पचे एक सरगे क खजाना क संचय करिहीं जउन भविस्य क बरे मजबूत नींव सिद्ध होई। इहीं स उ सच्चा जीवन क थामे रहई।

20तीमथियुस! तोहे जउन सँउपा गवा बा, तू ओकर रच्छा करा। बेकार क संसारी बातन स बचा रहा। अउर जउन “झूठा गियान” स सम्बन्धित बेकार क विरोधी बिसवासी हयेन, ओनसे दूर रहा काहेकि 21कछू लोग यह दावा करत हौं कि वे इसे “गियान” क जानत अहा, पर उ वास्तव में बिसवासे स दूर चला जात हौं। परमेस्सर क अनुग्रह तोहरे साथे रहई।